

LA FVITTE
DES
MALTOTIERS
APRES
MAZARIN.

MISE EN VERS BURLESQVES.

Par le Sieur POMPHOLLIS.

DEPVIS que vous estes sortis,
Messire Iulles hors de Paris,
L'on a bien taillé des croupieres
A Messieurs vos Secretaires,
Qui ont aussi pesché au plat,
Et qui n'ont sçeu vostre depart.
L'on en voyoit dans cette ville
Plus de cent, voire plus de mille
Qui se vouloient aussi sauuer,
Afin de vous aller trouuer.
Voyant qu'on mettoit icy ordre,
Et qu'ils ne sçauoient plus où mordre,
Les vns couroient parmy la ruë,
Qui d'une façon mal-autruë,
Se disoient Seigneurs d'un village,

Et qu'on leur donnaist le passage:
 Les autres grands Monopoleurs,
 Noircis comme des Ramoneurs,
 Vestus d'habits de gueuserie,
 Pour tascher de sauuer leur vie:
 D'autres retournoient leurs habis
 Pour sortir deuers Sainct Denis,
 Et par la porte de Sainct Iacques
 Il en est forty sans casques,
 Qui se disoient mourir de faim,
 Et qu'ils alloient chercher du pain,
 C'est vous qu'ils suiuoient à la piste
 Comme petits Mazarinistes:
 Mais tous les gros sont demeurez,
 Qui souffrent autant que les damnez,
 On les a fait rougir de honte
 Quant on leur a demandé conte
 Des Louys qu'ils ont pris pour vous.
 Je trouue qu'ils estoient bien fous,
 De mettre tout leur esperance
 A vostre trompeuse Eminence:
 Ils en sont bien aux repentans,
 D'auoir passé tant de comptans;
 Dont l'un d'eux qui n'estoit pas sot
 S'est retiré tout aussi tôt,
 Qu'il a veu que vostre Eminence
 Commençoit n'estre en assurance.
 Je crois que vous auez regret
 De ce beau Palais imparfait,

Et cette grand' Bibliotheque;
 Tomes de Grenade & Seneque;
 Et autres beaux liures Romains,
 Qu'on ne vous rendra pas és mains.
 Reuenant à vostre caballe,
 Qui tousiours appreste leur malle,
 Attendant que leur enuoyez
 Ces machines des autres annez,
 Où ils mettront leur equipage,
 Et leur honneste personnage.
 Ils prendront les cordes du bal
 Qui sont au Palais Cardinal,
 Pour estre enleuez hors de France
 Où se plaira vostre Eminence.
 Ils sortiront sans passeport,
 Ny sans parler ny dire mot,
 Pourueu que les cordes soient fortes
 Pour seulement sortir les portes;
 Et vous commanderez tout haut
 Que l'on vous enleue bien haut
 A la grand' troupe diabolique
 Avec leurs violons & musique,
 Estant conduits par Belzebut
 Les feront arriuer au but,
 En Enfer tousiours en souffrance
 Au desir de toute la France.

A P A R I S,
 M. D C. X L I X.

944.03

M475m

No. 1455

陳思平

43